

PENGHAYATAN ETIKA & PERADABAN. Oleh Ateerah Abdul Razak, Nur Azuki Yusuff & Zaleha Embong (penyunting). 2021. Penerbit UMK, Universiti Malaysia Kelantan. Halaman 212. ISBN 978-967-2912-48-4.

Buku Penghayatan Etika dan Peradaban ini merupakan edisi baharu pengajian umum universiti yang menggantikan kursus Hubungan Etnik. Penulisan yang merangkumi 10 bab ini disusun mengikut keutamaan bidang perbincangan dan diselaras berdasarkan garis panduan yang diberi oleh pihak Jabatan Pengajian Tinggi. Melalui buku ini, para pembaca didedahkan tentang konsep etika daripada perspektif peradaban yang berbeza. Ini bertujuan bagi mengenal pasti sistem, tahap perkembangan, kemajuan dan kebudayaan merentas bangsa dalam mengukuhkan kesepadan sosial. Selain itu, perbincangan dan perbahasan berkaitan isu-isu kontemporari dalam aspek ekonomi, politik, sosial, budaya dan alam sekitar daripada perspektif etika dan peradaban dapat melahirkan mahasiswa yang bermoral dan profesional. Buku ini juga menggalakkan mahasiswa menghayati kehidupan sosial secara beretika dan mengamalkan apa yang dipelajari dengan mengambil kira pelbagai isu semasa dalam negara. Usaha melestarikan penghayatan etika dengan inovasi sosial secara holistik dan bersepada menjadi keutamaan serta keperluan bagi membina peradaban Malaysia yang tinggi. Bagi tujuan ulasan buku ini, pengulas akan membuat kesimpulan dan ulasan secara turutan dari bab satu sehingga bab yang terakhir. Kupasan ini dilakukan memandangkan setiap bab dalam buku ini mengandungi perbincangan topik yang berbeza. Walau bagaimanapun, setiap perbincangan bab mempunyai perkaitan di antara satu sama lain.

Sebagai permulaan, **Bab 1** merupakan perbahasan awal secara umum tentang definisi dan konsep 'etika' dan 'peradaban'. Penulis menerangkan dengan teliti bahawa kedua-dua konsep ini merupakan elemen penting terhadap perkembangan dan kemajuan sejarah tamadun manusia lampau. Lantaran itu etika dan peradaban merupakan sesuatu yang penting bagi memahami dan menghayati dinamika sesebuah masyarakat yang mempunyai sejarah dan proses interaksi yang kompleks dan tersendiri. Kedua-dua konsep ini dibincangkan satu persatu dan dikaitkan dalam konteks susur masa prakolonial, kolonial dan pascakolonial. Penulis turut membahagikan perbincangan dalam bab 1 ini kepada 3 fokus utama. Fokus pertama adalah perbincangan tentang pergerakan idea dan amalan etika dan peradaban dunia. Fokus kedua, adalah terhadap konsep etika khususnya dengan menghuraikan pengertiannya dalam konteks sejarah pemikiran Eropah, daripada zaman sebelum, semasa dan selepas enlightenment. Kemudian penulis mengupas impak kefahaman dan amalan konsep etika ketika disemaikan semasa zaman kolonial dan pascakolonial di luar Eropah. Fokus ketiga perbincangan adalah terhadap konsep 'peradaban' berdasarkan susur masa prakolonialisme, kolonialisme dan pascakolonialisme, timur dan barat, perspektif agama dan kepercayaan. Penulis telah menjelaskan secara khusus definisi beberapa istilah penting seperti etika, adab, adat resam dan adat istiadat.

Seterusnya, dalam **Bab 2** penulis telah mengupas impak kefahaman dan amalan konsep etika ketika disemaikan semasa zaman kolonial dan pascakolonial di luar Eropah. Pada masa yang sama, penulis turut membincangkan mengenai sejarah pergerakan idea, amalan etika dan peradaban di Malaysia dengan merujuk kepada kewujudan tamadun awal yang bertapak di Tanah Melayu dan berkembang melalui proses interaksi dan pengaruh unsur tertentu. Sebagai contoh, kepercayaan animisme merupakan pegangan awal masyarakat tradisi yang berdasarkan semangat dan roh alam sebelum kurun ke-3. Kepercayaan ini dalam bentuk adat resam telah mewujudkan elemen nilai dan tingkah laku berdasarkan kepercayaan terhadap roh dan semangat alam dalam kalangan

masyarakat ketika itu dan ada yang kekal sehingga ke hari ini seperti amalan pemujaan dan seumpamanya. Kedatangan agama Hindu seawal kurun ke-3 ke Tanah Melayu telah mengubah dan mempengaruhi aspek kepercayaan dan adat resam dalam sosial masyarakat. Namun kedatangan dan perkembangan agama Islam ke Tanah Melayu secara rancaknya bermula kurun ke-12 telah memberi kesan besar terhadap pandangan semesta masyarakat tempatan. Pengaruh ajaran Islam berkembang dengan meluas sehingga mendasari aspek nilai dan peradaban masyarakat setempat dalam segenap aspek kehidupan. Selain prinsip syariat yang menjadi kerangka asas kepada sistem kehidupan keseluruhan, nilai tradisi terdahulu akibat pengaruh Hindu masih diterima dalam ruang lingkup yang dibenarkan mengikut kesesuaian syariat Islam. Manifestasi kesyumulan Islam ini dapat dilihat melalui nilai moral, akhlak dan kesopanan yang menjadi elemen penting terhadap pembentukan masyarakat atau warganegara beradab dan bertanggungjawab. Selain aspek kepercayaan secara khusus, perkembangan etika dan peradaban khususnya di Tanah Melayu juga terkesan akibat pengaruh luar terutamanya daripada kerajaan-kerajaan awal yang muncul sebagai pelabuhan di sekitar Kepulauan Melayu.

Kemudian dalam **Bab 3**, penulis membincangkan bagaimana proses susur masa yang membentuk peradaban masa kini dengan mengupas mengenai isu migrasi dan kepelbagaiannya yang berkait rapat dengan konsep peradaban masyarakat khususnya di Malaysia. Bab ini juga membincangkan mengenai beberapa komponen etika dan peradaban dari aspek persekitaran, masyarakat, ekonomi dan pemikiran. Tujuan bab ini adalah agar pembaca dapat menghayati konsep kebersamaan antara masyarakat pelbagai etnik dan bangsa yang diaplikasi dalam kehidupan secara penuh beretika dan beradab.

Bab 4 seterusnya menjelaskan tentang pemantapan kesepadan nasional Malaysia. Penulis dalam bab ini membincangkan tentang konsep kepelbagaiannya masyarakat yang menimbulkan pelbagai cabaran kepada sesebuah masyarakat, seperti Malaysia. Setiap komuniti misalnya mempunyai etika dan peradaban yang berbeza dan terjelma dalam pemikiran dan praktis kehidupan masing-masing. Namun, kesemuanya perlu hidup dalam sebuah masyarakat Malaysia, berkongsi persamaan dan mencari titik pertemuan ketika terjadi perbezaan. Menurut penulis lagi, kesediaan tawar-menawar, berunding dan melakukan mediasi telah membawa keamanan, kestabilan dan keharmonian di Malaysia semenjak merdeka. Hal ini menunjukkan kesepadan nasional yang telah wujud, didukung dan mesti terus-menerus dimantapkan. Hal ini dilaksanakan melalui tiga rangkaian proses yang bergerak serentak dipacu oleh tiga motivasi, iaitu perpaduan yang diidamkan, kesepadan yang dicapai dan penyatupaduan yang diusahakan.

Menurut penulis, perpaduan merupakan idaman seluruh masyarakat Malaysia, tetapi masih belum tercapai. Perpaduan merujuk kepada satu proses yang menyatupadukan seluruh masyarakat dan negara supaya setiap anggota masyarakat dapat membentuk satu identiti dan nilai bersama serta perasaan cinta dan bangga akan tanah air. Perpaduan sebagai suatu hasrat yang diidamkan oleh seluruh rakyat Malaysia namun hal ini sukar diukur, dilihat secara nyata mahupun berkekalan. Perkara ini biasanya hadir mengikut keadaan, keperluan dan detik-detik tertentu secara formal atau tidak formal dalam kehidupan sehari-hari masyarakat. Atas dasar itu, masyarakat Malaysia perlu sentiasa berusaha mencari jalan ke arah penyatupaduan. Kesemua ini dilakukan berdasarkan tiga prinsip utama, iaitu tawarmenawar (bargaining), berunding (negotiation) dan perantaraan (mediation). Menurut penulis lagi, perpaduan nasional menjadi misi penting bagi negara dan memerlukan kerangka bersifat komprehensif yang mampu menterjemahkan wajah kerencaman

masyarakat majmuk Malaysia. Keadilan, penerimaan dan toleransi perlu menjadi nilai asas kepada kerangka perpaduan nasional ini dan nilai itu perlu digarap dengan menjadikan Islam sebagai kayu ukur utama dalam mendukung agenda perpaduan nasional dalam konteks Malaysia.

Setelah itu, penulis dalam **Bab 5** mengupas mengenai pembinaan peradaban majmuk yang wujud di negara Malaysia. Ia merupakan kerangka asas dalam membina dan mengukuhkan konsep negara bangsa. Konsep tersebut ber mewujudkan sebuah bangsa idaman iaitu bangsa Malaysia yang bersatu padu berasaskan etos budaya bangsa. Selain itu, konsep negara bangsa ini dilihat sebagai inisiatif bagi memupuk nilai taat setia dalam masyarakat bagi menggembang tenaga dalam menjayakan sebuah negara yang memiliki peradaban yang tinggi. Menurut pandangan pengulas, perbincangan dalam bab ini memberi tumpuan untuk memahami etos budaya kenegaraan yang melibatkan perkembangan awal kewujudan alam Melayu sebagai sebuah peradaban yang telah pun wujud sebelum lahirnya Malaysia moden pada hari ini. Penulis turut menjelaskan keperluan untuk menyentuh peradaban awal dan memberikan asas kefahaman yang penting untuk dihayati dengan mengambil kira proses interaksi peradaban Melayu dengan peradaban lain seperti Arab, India, Cina dan Eropah, khususnya British di Tanah Melayu.

Dalam **Bab 6** pula, penulis menekankan fungsi dan peranan Perlembagaan Persekutuan sebagai tapak integrasi dalam membentuk semangat perpaduan dan integrasi antara masyarakat yang mempunyai latar belakang yang pelbagai. Antara isu-isu yang berkaitan dengan konsep integrasi ini adalah pemahaman tentang kedudukan orang Melayu, raja-raja Melayu, isu agama dan juga bahasa. Justeru, fungsi Perlembagaan Persekutuan amat signifikan dalam memberi panduan kepada konsep pemerintahan negara. Ia juga disebut sebagai kontrak sosial kerana kandungannya meliputi keperluan untuk memenuhi kepentingan pelbagai pihak khususnya masyarakat Malaysia. Penulis juga menjelaskan bahawa terdapat segelintir pihak yang mempunyai kepentingan peribadi sering menyalahafsirkan fungsi Perlembagaan Persekutuan sehingga menimbulkan pelbagai krisis dan salah faham dalam kalangan masyarakat. Namun begitu, masyarakat Malaysia masih mampu mengekalkan keamanan dan tidak timbul pertelingkahan serius yang membahayakan masyarakat lain. Pada masa yang sama, keluhuran Perlembagaan Persekutuan itu terbukti setelah 60 tahun Malaysia mampu mengekalkan keamanan dan keharmonian.

Seterusnya, penulis dalam **Bab 7** membincangkan bahawa pemantapan kesepaduan nasional yang berpaksikan etika dan peradaban di Malaysia perlu seiring dengan perkembangan teknologi terkini, khususnya teknologi maklumat dan komunikasi. ICT merupakan tapak digital yang memberi ruang kepada masyarakat berinteraksi dan membina jaringan sosial. Aplikasi digital seperti WhatsApp, Facebook, Twitter, Instagram, Telegram dan Zooms contohnya telah menjadi latar hidup masyarakat generasi semasa. Selain menjadi pemangkin sistem komunikasi, wujud juga isu-isu defisit sosial yang sering dibahaskan dalam pelbagai ruang sehingga ke dalam ruang digital. Secara fenomenologinya, ekoran tiada institusi sejagat yang mengawal perkembangan ini, ICT boleh menjadi alat dan sistem komunikasi yang merapatkan (positif) dan juga menjarakkan hubungan sosial (negatif). Penulis turut menzahirkan kegusaran apabila wujudnya isu-isu yang berleluasa seperti berita palsu dan ucapan kebencian melalui tapak digital yang boleh mengancam kesepaduan nasional di Malaysia melalui penggunaan ICT.

Kemudiannya, **Bab 8** pula membincangkan tentang peranan etika dan peradaban dalam mendokong tanggungjawab sosial. Realiti sosial yang ada dalam masyarakat Malaysia tidak

terlepas daripada realiti sosial yang berlaku di dunia masa kini. Realiti sosial sejagat terbahagi kepada dua bahagian iaitu pertama, realiti sosial yang ditentukan oleh pihak berkuasa, selalunya berasal dari atas ke bawah atau disebut juga sebagai takrifan autoriti. Kedua, realiti sosial yang lebih terbuka iaitu realiti sosial yang dibentuk oleh seseorang, sesebuah keluarga dan dalam kalangan komuniti untuk memenuhi keperluan sehari-hari masing-masing atau ia juga dipanggil takrifan harian. Atas dasar itu, penulis menjelaskan bahawa perubahan dan perkembangan realiti sosial masa kini banyak dipengaruhi oleh etika dan peradaban yang diwujudkan dalam masyarakat.

Sebagai contohnya, adat istiadat adalah takrifan autoriti kerana terdapat peraturan bertulis yang menentukan susunan dan pelaksanaan adat istiadat tersebut. Akan tetapi adat resam yang ada dalam masyarakat ditentukan oleh perilaku atau kebiasaan sehari-hari atau takrifan harian tanpa ada peraturan bertulis. Dalam konteks yang formal, adat istiadat memiliki protokol yang jelas, contohnya adat istiadat yang diamalkan oleh institusi beraja. Apabila ia melibatkan kerajaan dan negara asing, tahap formalitinya semakin ketat dan terperinci, termasuk perlunya melibatkan penggunaan pakaian rasmi dalam suatu acara. Hal ini memerlukan komitmen yang tinggi dari setiap lapisan masyarakat sebagai bentuk tanggungjawab sosial kepada negara. Untuk konteks tidak formal, meskipun tiada peraturan tertulis, tetapi terdapat tanggungjawab sosial dalam bentuk adab dan nilai hormat-menghormati yang menjadi panduan perilaku individu. Misalnya semasa menghadiri majlis kenduri perkahwinan, kenduri kematian atau upacara meminang, terdapat adab budaya yang tidak tertulis tetapi dijalankan secara turun-temurun daripada generasi ke generasi. Ini kerana etika dan peradaban adalah perilaku tanggungjawab sosial yang lahir daripada kesedaran sosial yang digerakkan dan diturunkan daripada generasi ke generasi secara berperingkat individu, keluarga, komuniti, masyarakat, dan negara bagi mencapai keadilan dan keharmonian.

Seterusnya dalam **Bab 9**, penulis menekankan tentang kepentingan kelestarian etika dan peradaban di Malaysia. Etika dan peradaban sepanjang sejarah tamadun manusia adalah berciri dinamik, sentiasa mengukuh, berubah-ubah dan tidak kekal. Tekad dan usaha memahami dan menghayati bentuk-bentuk etika serta peradaban ini termasuk inisiatif mengemukakan penjelasan berdasarkan kerangka yang tepat secara kritis, analitikal, saintifik dan merupakan tugas penting komuniti terpelajar. Bertitik tolak daripada kerangka peradaban majmuk, Malaysia membina etika dan peradaban beracuan sendiri dengan menyulam kepelbagaian etika dan peradaban dalam melahirkan sebuah negara dan ketamadunan yang damai, stabil dan sejahtera. Oleh kerana usaha membina ketamadunan bukan suatu perkara mudah dan dijamin berkekalan, maka masyarakat kontemporari perlu mengambil iktibar daripada sejarah lampau. Sejarah pasti berulang bagi mereka yang tidak mengkaji, mengambil iktibar dan menjadikannya sebagai panduan hidup bagi merancang masa hadapan. Pengalaman peradaban dalam konteks global dari zaman purba hingga sejarah kontemporari menunjukkan kedinamikan berlaku dan tiada satu pun peradaban kekal dan berterusan. Sebab dan akibat kejatuhan sesebuah ketamadunan adalah kompleks tetapi dicelah keruntuhan sistem kehidupan dan keagungan material yang tercapai muncul dan meluasnya keruntuhan nilai masyarakat yang terangkum di dalamnya pelbagai konsep seperti etika, moral, adab dan akhlak. Teras utama kepada kerangka sistem nilai dan etika ini adalah keadilan. Jika kezaliman mengambil tempat keadilan dan kesaksamaan, natijahnya kekejaman dan penganiayaan akan membawa kehancuran masyarakat sekali gus meruntuhkan sistem nilai kemanusiaan. Akhirnya, peradaban akan ranap dan runtuh tanpa nisan.

Akhirnya, dalam **Bab 10** yang terakhir, penulis menyimpulkan keseluruhan inti pati perbincangan, khususnya dalam menghayati etika keagamaan, demi memperkasa kesepadan dan peradaban bangsa Malaysia. Perbincangan bab ini menurut pengulas adalah bersifat rumusan dan penegasan di sebalik nilai dan refleksi hidup bernegara dan beragama. Tiga pendekatan diketengahkan dalam bab akhir ini. Pendekatan yang pertama ialah pembinaan bangsa Malaysia yang sedang berlangsung. Pendekatan kedua ialah melihat kepada kondisi mahasiswa dan belia negara sebagai peneraju. Seterusnya pendekatan yang terakhir ialah mengetengahkan konsep etika beragama sebagai panduan mudah dalam amalan dan penghayatan etika dalam kehidupan bersama. Kematangan hidup bernegara dan usaha membina peradaban di Malaysia sudah bermula seawal usaha pembebasan diri daripada cengkaman penjajah lagi. Pejuang-pejuang negara yang mewarnai kebangkitan rakyat, semuanya memiliki jati diri kebangsaan dan patriotik yang unggul. Kini, perubahan geopolitik negara terfokus kepada pembinaan negara bangsa. Kerencaman hidup dalam ruang hidup sosial, ekonomi dan budaya daripada masyarakat kemajmukan dari era kolonial telah berubah kepada norma kehidupan sejagat dalam masyarakat kepelbagaian. Budaya politik baharu telah menyumbang kepada norma yang mengutamakan kebebasan bersuara, akses maklumat, penglibatan politik tanpa mengira parti dan oligarki.

Kesimpulannya, pengulas berpandangan isi perbincangan dalam buku ini amat bermanfaat untuk dibaca dan difahami oleh semua lapisan masyarakat terutama dalam konteks negara Malaysia yang mempunyai masyakat pelbagai. Segala cadangan dan lontaran idea yang dijelaskan oleh para penulis dalam buku ini perlu dipandang secara serius dan bersungguh-sungguh. Ini penting bagi memastikan objektif utama perbincangan dalam buku ini sampai kepada hati semua pembacanya dan akhirnya mampu direalisasikan dalam dunia masyarakat Malaysia yang sebenar.

Hajah Makiah Tussaripah Binti Jamil

Pensyarah Kanan

Akademi Pengajian Islam Kontemporari (ACIS)

Universiti Teknologi Mara (UiTM) Cawangan Negeri Sembilan, Kampus Seremban.